

11. august 2006  
2. februar 2006

UKA 2006/7  
UKIU 2006/72

**Tunngaviusumik atuarfiit namminersortitat angerlarsimaffimmilu  
atuartitaaneq il.il. pillugit Inatsisartut inatsisaata allanngortinnissaanut  
Inatsisartut inatsisissaattut nr. xx xx 2006-imeersutut siunnersuut.**  
(Atuarfiit illutaanik sananermi sanaartornermut taarsigassarsinissamut periarfissaq)

## § 1

Tunngaviusumik atuarfiit namminersortitat angerlarsimaffimmilu atuartitaaneq il.il. pillugit Inatsisartut inatsisaannut nr. 10 ulloq 15. april 2003-meersumi makku allannguutigineqassapput:

1. § 18, *imm.* 2 atorunnaarpoq.

2. §18 kingorna kapitali 5 ima oqaasertaqassaaq:

"**18a.** Tunngaviusumik atuarfiit namminersortitat atuarfiit illutassaannik sanaartornermut aningaasartuutissaasa katinnerisa 30%-iinik tunngaviusumik atuarfiit namminersortitat naalakkersuisut taarsigassarsitissavaat. Tunngaviusumik atuarfiit namminersortitat atuarfimmik sanaartornernermut aningaasartuutissaasa katinnerinisa 10%-iinik kommunalbestyrelsip taarsigassarsitissavaat.

*Imm.* 2. *Imm.* 1 naapertorlugu taarsigassarsisitsineq taamaallaat pisinnaavoq tunngaviusumik atuarfiup namminersortitap sanaartornermut aningaasartuutit katinnerisa 10%-iinik nammineq aningaasaliissuteqarpat.

*Imm.* 3. Sanaartornermi aningaasartuutit sinneri tunngaviusumik atuarfiup namminersortitap nammineerluni aningaasaliissuteqarfigissavai, soorlu aningaaserivimmit imaluunniit taarsigassarsisitsisarfimmit taarsigassarsinermigut.

*Imm.* 4. *Imm.* 1 malillugu taarsigassarsiat sanaartornerup naammassinerani tunniunneqassapput. Taarsigassarsineq illuutit qularnaveeqqusiunnerisigut qulakkeerneqassaaq, *imm.* 3-lu malillugu tunngaviusumik atuarfiup namminersortitap taarsigassarsereerneratigut qularnaveeqqusiunneqassallutik.

*Imm.* 5. *Imm.* 1 malillugu taarsigassarsiat ukiuni 15-ini erniaalersorneqaratillu taarsersorneqassanngillat, taassumalu kingorna ukiut qulit ingerlanerini taasersukkat amerliartuaartutut erniaallu ikiliartuaartutut taarsersuineqassalluni, erniaalersuinermilu Nationalbankenip erniaalersuina malinneqassaaq qaavatigut 3%-imik ilallugu.

*Imm.* 6. Taarsigassarsisitsisut allamik aalajangiinngippata, ima pisoqarneratigut taarsigassarsiat akileqquneqassapput taarsigassarsiat erniaavi taarsersukkallu akilersorneqanngippata, tunngaviusumillu atuarfiup namminersortitap kinguaattoorutini allakkatigut tunngaviusumik atuarfiup namminersortitap

akileeqquneqarnerminit kingusinnerpaamik ullut 7-it qaangiunnerini akiliisimangippagit, tunngaviusumik atuarfiup namminersortitap illuutit isumannaatsumik aserfallatsaaliunngippagit, paarinerluippat taamaalillunilu taarsigassarsisitsisut qularnaveeqqusiussaat ajortinneqarsimasut paasineqarpat, imaluunniit illuutit allanut tunineqarpata.

*Imm. 7.* Illut sanaartorerup nalaani sanaartorneq pilersaarusernerlu pillugit inatsisit atuuttut malillugit kiisalu sanaartoriaatsimi ingerlatsinermilu najoqqutassanik eqquutsisitsisut kisimik taarsigassarsisutigineqarsinnaapput.

*Imm. 8.* Imm. 1 malillugu taarsigassarsinissamik qinnuteqannginnermi tunngaviusumik atuarfik namminersortitaq nunaminertamik sanaartorfissamik kommunalbestyrelsimit tunineqareersimassaaq.

*Imm. 9.* Taarsigassarsinissaq aatsaat neriorsuutigineqarsinnaavoq sanaartornissamut pilersaarut aningaasaqarnerlu Naalackersuisunit kommunalbestyrelsimillu nalilerneqarlutillu akuerineqareerpata, kiisalu tunngaviusumik atuarfik namminersortitaq sanaartornissamut aningaasartuutissat katinnerini nammineq aningaasartuutigisassani uppersaasioreersimappagit.

*Imm. 10.* Tunngaviusumik atuarfiit namminersortitat sanaartornissamut taarsigassarsiniarnissaat pillugu Naalackersuisut malittarisassanik erseqqinnerusunik aalajangersaasinnaapput.

**§ 18b.** Tunngaviusumik atuarfiit namminersortitat aningaasaliissutissanut allanut aningaasartuutissaannut Naalackersuisut kommunalbestyrelsilu tapiissuteqarsinnaapput taarsigassarsisitsisinnaallutillu."

## § 2

Inatsisartut inatsisaata atuutilerfigissavaa ulloq 1. januari 2007.

*Namminersornerullutik Oqartussat, ulloq xx. xxxxx 2006*

Hans Enoksen

/

Doris Jakobsen